

Iwarakha yo upachera i Nayohana Malhove o uholhelha

Iwarakha yo upachera i Nayohana yaalhepiye ni akarumiya Nayohana iyaakha cho 85-90 baada yo uyaria wa Kuristo. Nayohana khaneechooniha wiira phi ayo alhempe yeyo iwarakha iyo, nansho nlhako wo upacha ahooniha wiira yaari oonechenshe ukumi ni uhihimmwa wa Yesu (nlhako wo 1:1-3). Iphiro ilhepiye ilha iwarakha yo upachera i Nayohana ilha, iholhikaana chinene ni iphiro ilhepiye Malhove Orera a Yesu Kuristo alhepiye ni Nayohana. Ni vavawo ihoonia we ikekhiaye wiira Nayohana phi lhempe Malhove Orera a Yesu Kuristo ni iwarakha taaru cho, Iwarakha yo upachera i Nayohana, iwarakha yo nayelhi i Nayohana ni iwarakha yo neraru i Nayohana vaari aya akhalhaka Uefeso.

Nayohana yaalhempe ilha iwarakha ilha wa attu onkhaye o nlhoko wa attu anrumelhenlhe Kuristo ikatema yoyo nlhoko uyo vaari aya uthemwihiyaka ni nlhoko wa attu yeehaniya “Anostiki”. Yayo attu ayo yaarumelhelha wiira Kuristo aari Nlhuku wo kila iphiro, nansho khaari thoko ntu vaari awe velhaponi va. Wo yoyo nlhatu uyo etu, Nayohana aalhempe iwarakha ilha wo ukhalha ntu amwonechenshe Kuristo ni unkhalthana vamoka ni ummara (nlhako wo 1:1-3). Nnikwa u Nayohana ulhepa

ilha iwarakha ilha waari uhimiechesha uteelhiya waya (nlhako wo 1:4) ni waalhaka attu yanrumelhenlhe Kuristo wiira ahiwonye (nlhako wo 2:1) ni weettuchiha attu anrumelhenlhe Kuristo ahiwelhelhe meettuchiho o woothachiya (nlhako wo 2:26) ni waahimiachera attu yanrumelhenlhe Kuristo wiira ahoopolhiya (nlhako wo 5:13).

Chiri nhina

Nayohana anooholhelha uhimiacha iwarakha aya ni uhimiacha nlhatu aya mmoka wo ulhepa iwarakha iyo (nlhako wo 1:1-4).

Tho anohimiacha Nlhuku chiri awe nthuko ni makhalhelho anothananiya ihu ukhalha thoko chaakhanlhe awe Yesu (nlhako wo 1:5-3:10).

Thothoni tho, anonuupusha malheheriyo o uttunana naashinene (nlhako wo 3:11-5:12). Malhove o umalhihera iwarakha aya (nlhako wo 5:13-21).

Nlhove ninaavaha attu ukumi

¹ Ninolhepa uwaninyu mwaatti uuchuwelhihani mwaha wo Nlhove nowiia ukumi ari toka machokholhelho. Hii nahomwiiwa ni umwoona wo miitho ihu naashinene, eiyo, nahomwoona ni ummara wo mathatha ihu naashinene. ² Ulha ukumi ulha voonelhe aya nahoona. Paahi etu vano phi nohimiechesha ihu uuhimeriani mwaha wo ukumi wo uhimalha waari wa Athithi naachuwelhihiye ihu. ³ Nonne ihu ni wiiwa phi ninohimia ihu wiira ni inyu nlhutane ni hii. Nikhalhe nlhoko mmoka muulhutaanani wihu ni Athumwanihu ni mwaamwanaya Yesu

Kuristo. ⁴ Ninolhepa ulha mwaha ulha uwaninyu mwaatti wiira mpuha ihu utimire.

Nlhuku phi nthuko

⁵ Ni ulha phi nntenga univanhe awe Yesu unohimia wiira, Nlhuku phi nthuko ni nhina mwawe khuuwo uripelha uriwoothe. ⁶ Neeraka wiira niholhutaana nlhoko mmoka uno nikhalhaka mu uripelhani, vavawo ninowoothacha wo malhove ni mitheko chihu khachirii che ikekhi-aye. ⁷ Nansho nakhalhaka munthukoni thoko yoyo chiri awe munthukoni, paahi etu vavawo ninookhalha nlhoko mmoka naashineneru ni iphome ya Yesu, Mwaamwanawe, inoonihapiha uwonya wonkhaye.

⁸ Neeraka wiira khaninawonya nineethepi-acha naashineneru ni ikekhiaye khiiwo nhina mwihu. ⁹ Nansho narumelhelhaka uwonya wihu, Nlhuku ri o ukhulhovelhiya ni e ikekhi-aye. Nonihiyerera uwonya wihu ni uni-hapiha ukhuma mu uhilhokani mwonkhaye. ¹⁰ Neeraka wiira khaninawonya ninompanga Nlhuku o woothacha ni nlhove nawe nihikhalhaka mmamirimani mwihu.

2

Kuristo Moopolhi phi nkavihi ihu

¹ Achishaana aka kinaattuna aka, kinolhepa tho ulha mwaha ulha wiira nhiwonye. Nansho ntu riyoothe awonyakaru nihanaa o mmoka nonikaviha unichontelhelha wa Athithi, phi Yesu Kuristo, o ikekhiaye mmiholho wa Nlhuku.

² Kuristo mwanene phi isadaka yo nlhatu wo

uhiyereriya uwonya wihu, ihikhalhaka uwonya wihuru nansho ata uwonya wa attu onkhaye.

³ Neewelhelhaka malhehero a Nlhuku, paahi etu ninowiira nihonchuwelha. ⁴ Ntu neera honchuwelha Nlhuku nansho hiiwelhelhaka malhehero awe, paahi etu yoyo hoothacha ni ikeekhene khiiwo nhina mwawe. ⁵ Ntu riyoothe neewelhelha malhove a Nlhuku, wo ikekhiaye yoyo phi ntu nonttuna Nlhuku. Vavawo phi nohalha ihu wiira ninolhutaana ni Nlhuku. ⁶ Ntu riyoothe neera wiira holhutaana ni Nlhuku yoyo hothananiya ukhalha thoko chaakhakha awe Yesu Kuristo.

Malhehero o Naanano

⁷ Ashilhoko aka kinaattuna aka, alha malhehero kinouhimeriakani alha kahii o naanano, phi yalhe o khalhayi alhe mweewilhe inyu toka machokholhelho. Malhehero o khalhayi ayo phi malhove mweewilhe inyu ayo. ⁸ Inakhalhaka chiicho etu malhehero kinolhepa aka vano alha o naanano. Ni ikeekhene aya iri nhina mwa Kuristo ni nhina mwinyu mwaashinene. Ukhalhawaya uripelha unoothama ni nthuko we ikeekhene uhochokholha umwalhia.

⁹ Ntu riyoothe neera wiira ri munthukoni nansho ampangelhaka ichimwa nhima awe yoyo ntu uyo ri mu uripelhani. ¹⁰ Ntu riyoothe nonttuna nhima awe ri munthukoni hikhalthaka ni ittu iriyoothe yo unttekiha nkhananawe. ¹¹ Nansho ntu nompangelha ichimwa nhima awe yoyo ri mu uripelhani. Khachuwenlthe unokelha awe, ukhalhawaya uripelha uhontiyelhelha wiitho.

12 Kinolhepa uwaninyu achishaana aka kinaatuna aka va ukhalhawaya uwonya winyu uhohiyereriya, wo isadaka yaakumihiye wo iphiro ya Kuristo Moopolhi.

13 Kinolhepa uwaninyu mwaatti manyaathumwanakava ukhalhawaya nhonchuwelha yoyo ri toka machokholhelho uyo.

Kinolhepa uwaninyu mwaatti ashimirawova, ashilhopwana ni ashithiyana ukhalhawaya nhonkottolha Nakare.

Kinolhepa uwaninyu achishaanaka va ukhalhawaya nhaachuwelha Apwiiya.

14 Kiholhepa uwaninyu manyaathumwanakava, Ukhalhawaya nhonchuwelha yoyo aariwo toka machokholhelho uyo.

Kinolhepa uwaninyu mwaatti ashimirawova, ashilhopwana ni ashithiyana ukhalhawaya mwaatti nhanaa machiri

Ni nlhove na Nlhuku niri nhina mwinyu

Ni inyu nhonkottolha Nakare.

15 Chihuuchivelheni chittu cho mwiilhaponi mena ittu iriyoothe iri yo velhaponi. Ntu chinonchivelha chittu cho mwiilhaponi yoyo khanooria waattuna Athithi. 16 Ukhalhawaya chittu chonkhaye chiri cho velhaponi yaani nikakata no mwiiruttuni ni chittu chinoona aya attu nkaamiriha ishenye ni wiititihacha wo nlhatu wo ukumi. Chechiyo chonkhaye chiyo khachinokhuma wa Athithi nansho chinokhuma mwiilhaponi. 17 Ilhapo ni chittu chaya

chonkhaye chinaachivelha attu chinoovira, nansho ntu nopanga chinottuna awe Nlhuku yoyo nookhalha nkumi mahuku o uhimalha.

Nonvinga Kuristo

¹⁸ Achishaana aka umalha ilhapo uhaatameria vano. Nhomalha wiiwa wiira nonvinga Kuristo ri muuwani ni attu anonvinga Kuristo enchi ahomalha uwa vano. Paahi etu nihochuwelha wiira umalha ilhapo uhaatameria. ¹⁹ Yayo attu ayo akhumme munlhokoni mwihu nansho khayaari awihu phi nlhatu etu ahonihiyacha. Yakaari awihu anohalha ni hii. Nansho ahothamacha nkyaarwaa yoonie wiira khayaari awihu.

²⁰ Nansho nhohikiya makhura ni Iphumu ya Nlhuku ntakatifu ni inyu mwaatti onkhaye va nhochuwelha ikeekhene. ²¹ Paahi etu kinolhepa uwaninyu mwaatti kuhii wiira khanchuwenlhe ikeekhene nansho ukhalhawaya nhochuwelha. Tho ukhalhawaya nhochuwelha, khuuwo woothacha uriwoothe unkhuma nhina ikeekhene.

²² Mwoothacha phi mpani. Phi uyo noruna wiira Yesu kahiwe Kuristo Moopolhi thanliye ni Nlhuku. Ntu thoko yoyo phi nonvinga Kuristo, phi naaruna Athithi ni Mwaana. ²³ Ukhalhawaya ntu riyoothe hinonrumelhelha Mwaana naaruna Athithi chiicho. Ni ntu nomwiiweelhelha Mwaana noweewelhelha Athithi chiicho.

²⁴ Paahi etu nttenga mweewilhe inyu toka khalhayi ulhe ukhalheke mmamirimani mwinyu. Ni vavawo nttenga mweewilhe inyu toka khalhayi wakhalhaka mmamirimani

mwinyu paahi etu nnoolhokelha wo ulhutaana ni Mwaana ni Athithi. ²⁵ Ni malhehano anilhenhe awe Kuristo mwanene phi alha, univaha ukumi wo mahuku o uhimalha.

²⁶ Kinolhepa uwaninyu mwaatti, mwaha wo uwaamukani unaacha attu anothanana uupoterihani. ²⁷ Nansho uwaninyu mwaatti nhohikiya makhura ni Iphumu ya Nlhuku ukhuma wa Kuristo. Ni yoyo athepaka ukhalha nhina mwinyu khannomphavelha ntu riyoothe o wiituchihani. Ukhalhawaya yoyo nowiituchihani kila ittu ni meettuchiho awe ari e ikeekhene, ahoothachaka. Paahi etu nvarechesheke meetuchiho a yoyo, ni ukhalha wo ulhutaana ni Kuristo.

²⁸ Vano etu achishaana aka kinaattuna aka nhalheke nhina mwawe, ikhalhe nihuku nawe no uwa thothoni nno niwe neemelha rata, nihiwe neevitha wo wuulhiya muru. ²⁹ Mwachuwelhaka wiira Kuristo nopanga chittu choombone chinontelhiha Nlhuku chinene, paahi etu nchuwelheke tho wiira, kila ntu nopanga chittu chinathanana awe Nlhuku phi mwaana a Nlhuku.

3

Ashaana a Nlhuku

¹ Mwooneke etu Athumwanihu chinre aya wo unittuna chinene mpaka nineehaniya ashaana a Nlhuku. We ikekhiaye phi chiichammo chiri ihu. Phi chiichammo etu attu o velhaponi chihinonichuwelha aya ukhalhawaya khanonchuwelha Nlhuku. ² Ashilhoko aka kinaattuna aka,

hii vano phi ashaana a Nlhuku nansho khinachuwaniana mwaari chinohalha ihu ukhalha. Nansho nihochuwelha wiira Kuristo vanohalha awe uhokolhia ninoowa naakhalha thoko yoyo ukhalhawaya ninowa naamwoona chiri awe.

³ Paahi etu kila ntu nonkhulhovelha Kuristo nowiihapiha nrima akhalhe rata thoko Kuristo mwanene chinre awe wo ukhalha makhalhelho orera chinene wo uhitteka.

⁴ Kila ntu nowonya noottekela ikekha ya Nlhuku, ukhalhawaya uwonya phi uhiya uvarechesha ikekha. ⁵ Ni inyu nhochuwelha wiira Yesu Kuristo aawilhe uthamiha uwonya wihu ni wa yoyo khuuwo uwonya uriwothe. ⁶ Paahi etu ntu nolhutaana ni Kuristo khanowonya, nansho ntu riyoothe nowonya khamwonilhe mena unchuwelha Kuristo.

⁷ Paahi etu achishaana a Nlhuku, nhipoterihiye ni ntu riyoothe. Ntu nopanga chittu choombone chinathanana awe Nlhuku, nonteelhiha Nlhuku, thoko Kuristo chinonteelhiha awe Nlhuku. ⁸ Ntu riyoothe nowonya yoyo a Nakare, ukhalhawaya Nakare howonya toka machokholhelho. Nansho Mwaana a Nlhuku aawilhe velhaponi uutanganyani mitheko cha Nakare.

⁹ Kila ntu ri mwaana a Nlhuku khanothepa uwonya, ukhalhawaya ukumi wo naanano uvahiye awe ni Nlhuku uri nhina mwawe. Tho, khanothepa uwonya ukhalhawaya yoyo phi mwaana a Nlhuku. ¹⁰ Nansho ntu riyoothe hinopanga chittu chinathanana awe Nlhuku ama hinonttuna nhima awe yoyo kahii mwaana a Nlhuku. Vavawo phi novirikana aya ashaana a Nlhuku ni ashaana a Nakare.

Nittunaneke

¹¹ Ni nttenga mwiiwilhe inyu toka machokholhelho phi ulha, Nittunaneke naashineneru. ¹² Nihikhalhe thoko Kaini aamwiivilhe nhima awe wo uholhelhiya ni Nakare. Aamwiivilhe wo nlhatu waani? Amwiivilhe ukhalhawaya mitheko cha Kaini chaari cho uhilhoka nansho mitheko cha nhima awe uyo chaari choombone cho unteelhiha Nlhuku.

¹³ Paahi etu ashilhoko aka nhishange attu o velhaponi yopangelhakani ichimwa. ¹⁴ Hii nihochuwelha wiira nihommira nookhwa nihokelha uukumini wo nlhatu no waattuna ashihima ihu. Ntu hiri ni nrima wo uttuna yoyo bado ri avariyaka nnookhwani. ¹⁵ Kila ntu nonvenga nhima awe yoyo ntu o niiviho. Ni inyu mwaatti nhochuwelha wiira ntu riyoothe o niiviho kharina ukumi wo uhimalha nhina mwawe. ¹⁶ Hii nihomalha uchuwelha nrima wo uttuna phi ishiyani ukhalhawaya Yesu Kuristo ahokumiha ukumi awe wo nlhatu wihu. Ni hii etu nikumiheke ukumi ihu wo nlhatu na ashilhoko ihu. ¹⁷ Paahi ntu ri ni nhakhu wo velhaponi va amwoonakaru nhima awe ahuvaka, nansho nrima awe uhimwoonelhaka ikiriri, yoyo khanooria wiira nonttuna Nlhuku. ¹⁸ Achishaana aka, uttuna wihu uhikhalhe wo malhoveru nansho ukhalheke uttuna wo ikeekhene ni wo wooniha mitheko.

¹⁹ Paahi etu wo nenno nichuwelheke wiira hii niri nhina ikekhiaye, ni hii ninomaalhiha mirima chihu nihikhalhe ni nipampa mmiholho wa Nlhuku. ²⁰ Ata yakhalhaka mirima chihu chinonihukumulha wiira nihowonya, nihochuwelha

wiira Nlhuku phi mulhupalhe upwaha mirima chihu. Ni yoyo phi nochuwelha kila ittu.

²¹ Ashilhoko aka mirima chihu khachinoni-hukumulha, paahi etu khaninowa naakhalha ni nipampa mmiholho wa Nlhuku. ²² Ninoowa naapochera ittu iriyoothe ninolhepelha ihu ukhuma uwaannyawe, ukhalhawaya ninowii-welhelha malhehero awe ni upanga mitheko chinonteelhiha. ²³ Ni malhehero awe phi alha, urumelhelha nchina no Mwaamwanawe, Yesu Kuristo, ni uttunana naashineneru thoko chinre awe wo unihehera. ²⁴ Ntu neewelhelha malhehero a Nlhuku noolhutaana ni Nlhuku, ni Nlhuku nolhutaana ni uyo. Ni wo nenno ninoochuwelha wiira, Nlhuku nokhalha nhina mwihu wo iphiro yo Iphumu ya Nlhuku vahiye ihu.

4

Uphima Iphumu

¹ Ashilhoko aka nhinrumelhelhe kila ntu neera hanaa Iphumu ya Nlhuku, nansho mphimeke rata, nchuwelhe wiira hanaa Iphumu ya Nlhuku. Ukhalhawaya anamilhohi o woothacha enchi ahokhumelhelha mwiilhaponi mu. ² Chiichammo phi nohalha inyu unchuwelha ntu ri ni Iphumu ya Nlhuku. Kila ntu norumelhelha wiira Yesu Kuristo ahowa velhaponi nkaakhalha ntu, yoyo ntu uyo hanaa Iphumu ya Nlhuku. ³ Nansho kila ntu hinonrumelhelha Yesu Kuristo yoyo kharina Iphumu ya Nlhuku. Iphumu rina awe uyo phi iphumu nonvinga Kuristo, yeewillhe inyu wiira noowa ni vano homalha uwa mwiilhaponi mu.

⁴ Nansho achishaana aka, mwaattiva phi attu a Nlhuku, ni inyu nhomalha waakottolha anamilhohi o woothacha ayo. Ukhalhawaya yoyo Iphumu ya Nlhuku rii nhina mwinyu uyo phiri ni ikuru yuulhupalhe umpwaha Nakare ri o velhaponi uyo. ⁵ Yayo anamilhohi o woothacha ayo phi o velhaponi, anoolhumacha chittu cho velhaponi, ni ilhapo inoweewelhelha ukhalhawaya o velhaponi. ⁶ Nansho hii phi attu a Nlhuku. Ntu nonchuwelha Nlhuku nooniwelhelha. Ntu hinchuwenlhe Nlhuku khanoniiwelhelha. Paahi ninowooria uchuwelha Iphumu o ikeekhene ni iphumu yo woothacha.

Nlhuku phi nrima wo uttunana

⁷ Ashilhoko aka nittunaneke kila mmoka, ukhalhawaya nrima wo uttunana unokhuma wa Nlhuku. Kila ntu ri ni nrima wo uttunana phi mwaana a Nlhuku ni uyo honchuwelha Nlhuku. ⁸ Ntu hiri ni nrima wo uttunana khanchuwelhaka Nlhuku ukhalhawaya Nlhuku phi uttunana. ⁹ Nlhuku ahooniha unittuna wawe vanrumilhe awe Mwaana awe o yekha velhaponi, wiira nipatte ukumi wo iphiro awe. ¹⁰ Wowo phi uttunana we ikeekhene. Khanihiwe hii naachokhonlhe untuna Nlhuku, nansho Yoyo phi anittunne hii mpaka nkanruma Mwaana awe akhalhe isadaka yo uniwaananiha wo nlhatu wo unihyerera uwonya.

¹¹ Ashilhoko aka yakhalhaka etu Nlhuku ahonittuna chinene chommo, paahi etu ni hii nihothananiya uttunana chiicho.

¹² Khaawo ntu apantte umwoona Nlhuku ikatema iriyoothe, nansho nattunanaka

ashineneru, Nlhuku nookhalha ni hii, ni uttuna wawe wonkhaye unootimira nhina mwihu.

¹³ Wo nenno nlhove nno nihochuwelha wiira ninokhalha nhina mwawe ni uyo nokhalha nhina mwihu ukhalhawayaya honivaha Iphumu awe. ¹⁴ Ni hii nihoonechesha ni uhimiechesha wiira, Athithi ahonruma Mwaana aya akhalhe Mwoopolhi o ilhapo. ¹⁵ Ntu riyoothe norumelhelha ni uhimiacha mwanene wiira Yesu phi Mwaana a Nlhuku, nookhalha nhina mwawe, ni uyo nookhalha mu ulhutaanani ni Nlhuku. ¹⁶ Ni hii nihochuwelha ni urumelhelha wiira Nlhuku noonittuna. Nlhuku phi uttunana. Ni ntu ri ni nrima wo uttunana nokhalha nhina mwawe Nlhuku. Ni Nlhuku nokhalha nhina mwawe ntu uyo. ¹⁷ Nikhalheke etu wo uttunana velhaponi va, thoko Kuristo, nrima ihu wo uttunana unootimira nhina mwihu. Wiira niwe neemelha wo uhoova nihuku Nlhuku vanohalha awe waahukumulha attu onkhaye nno. ¹⁸ Nrima wo uttunana khunoova, nrima wo uttuna we ikeekhene unookakha woova. Paahi etu, ntu o woova khanatimira mu uttunani, yoyo noova utwarushiya.

¹⁹ Hii nihanaa nrima wo uttunana, ukhalhawayaya Nlhuku phi chokhonlhe unittuna. ²⁰ Ntu eerakaru nonttuna Nlhuku uno ampangelhaka ichimwa nhima awe yoyo hoothacha. Ukhalhawayaya ntu hinonttuna mmuchi nomwoona awe, yoyo khaooria untuna Nlhuku hinapacha awe umwoona. ²¹ Paahi etu nna phi nlheheriyo nonivaha awe Kuristo, nonttuna Nlhuku anttuneke etu nhima awe.

5

Nrima ihu uhokottolha ilhapo

¹ Kila ntu norumelhelha wiira Yesu phi Kuristo thanhiye ni Nlhuku phi mwaana a Nlhuku. Ukhalhawaya kila ntu nonttuna naangoro, nonttuna ni mwaana yariye. ² Phi chiichammo chinochuwelha ihu wiira, ninowaattuna ashaana a Nlhuku, ni untuna Nlhuku ni uvarechesha malhehero awe. ³ Ukhalhawaya untuna Nlhuku phi uvarechesha malhehero awe. Ni malhehero awe ayo kharinke, ⁴ ukhalhawaya kila ntu ri mwaana a Nlhuku nowooria ukottolha ilhapo. Phi chiichammo chinokottolha ihu ilhapo ukottolha wo nrima ihu. ⁵ Phi mpani etu nooria ukottolha ilhapo? Phi ulhe ntu norumelhelha wiira Yesu phi Mwaana a Nlhuku.

Uhimiecheshiya Yesu Kuristo

⁶ Yesu Kuristo phi aawilhe wo maashi o ubatiiziya wawe ni wo iphome yo nookhwa awe. Khaawilhe wo maashiru nansho wo maashi ni wo iphome. Ni Iphumu ya Nlhuku noohimiechesha wiira, phi ikeekhene ukhalhawaya Iphumu ya Nlhuku phi ikeekhene. ⁷ Paahi etu Iphumu ya Nlhuku phi o uhimiechesha ukhalhawaya Iphumu phi ikeekhene. ⁸ Ni uhimiechesha waya yayo araru ayo, Iphumu, maashi ni iphome unowiiwanana. ⁹ Narumelhelhaka uhimiechesha wa ntu nansho etu uhimiechesha wa Nlhuku phi mulhupalhe chinene. Ukhalhawaya Nlhuku mwanene, honhimiechesha Mwaamwanawe. ¹⁰ Ntu

nonrumelhelha Mwaana a Nlhuku hanaa nlhove no uhimiechesha nhina mwawe. Nansho ntu hinonrumelhelha Nlhuku honvaanyiha, ukhalhawaya kharumelhenlhe uhimiechesha ukuminhe awe Nlhuku unomwaacha Mwaamwanawe. ¹¹ Ni uhimiechesha uwo phi wuu, Nlhuku ahonivaha ukumi wo mahuku o wo uhimalha ni yoyo ukumi uyo uri wo iphiro yo Mwaamwanawe. ¹² Ntu riyoothe norumelhelha ukhalha Mwaana a Nlhuku, hanaa yoyo ukumi uyo, hinonrumelhelha Mwaana a Nlhuku kharina ukumi.

Ukumi wo mahuku o uhimalha

¹³ Kinolhepa uwaninyu mwaatti nnorumelhelha wo nchina no Mwaana a Nlhuku va, nchuwelhe wiira nanaa ukumi wo mahuku o uhimalha. ¹⁴ Ni hii ninowiishipa mmiholho wa Nlhuku, ukhalhawaya nihanaa ikeekhene wiira, nooniiwelhelha nanlhepelhaka ittu iriyoothe thoko chinathanana awe. ¹⁵ Nooniiwelhelha kila vanonlhepelha ihu, ukhalhawaya nihochuwelha wiira nooniiwelhelha. Tho, nihochuwelha wiira noonivaha onkhaye anonlhepelha ihu.

¹⁶ Ntu amwoonaka mmuchi awe howonya uhinonrweeha unookhwani anlhapelheke wa Nlhuku, nommaha ukumi. Kinohimia cho kaachaka attu awonnye uhinaarweeha unookhwani. Nansho uhaawo uwonya unonrweeha ntu unookhwani ni mii akineera wiira munlhapelheke Nlhuku wo yoyo nlhatu uyo. ¹⁷ Ntheko uriwoothe wo uhilhoka mmiholho wa Nlhuku phi uwonya, nansho uhaawo uwonya uhinonrweeha ntu unookhwani.

¹⁸ Nihochuwelha wiira ntu riyoothe munnhokoni mwa ashaana a Nlhuku khanowonya, ukhalhawaya Mwaana a Nlhuku noowiinanelha, ni Nakare khaanooria waatameria.

¹⁹ Hii nihochuwelha wiira phi ashaana awe Nlhuku, inakhalhaka wiira ilhapo yonkhaye inotawariya ni Nakare.

²⁰ Nihochuwelha tho wiira Mwaana a Nlhuku howa nkaanivaha irusho cho unchuwelha Nlhuku e ikekhiaye, wiira nikhalhe nilhutaanaka ni Nlhuku e ikekhiaye ni muulhutaanani ni Mwaamwanawe Yesu Kuristo. Ulha phi Nlhuku e ikekhiaye ni ulha phi ukumi wo uhimalha.

²¹ Achishaana aka kinaattuna aka, nhithimiche isinyago!

Makua New Testament 2015
Makhuwa-Meetto: Makua New Testament 2015 New
Testament

copyright © 2016 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-11-11

PDF generated using Haiola and XeLaTeX on 11 Nov 2022 from source files dated 29 Jan 2022

87ae4d2f-90f6-5bdd-b41e-00464a1ad514